

DEN AMBIENTE



MIRUGIA DE CUBA:

STUDIANTE DI BERKLEE COLLEGE OF MUSIC

DEN AMBIENTE tabata tin un entrevista cu e futuro musico local di 21 aña Mirugia De Cuba, kende actualmente ta studiando den un di e institutonan di musica mas renombra di Mundo "BERKLEE COLLEGE OF MUSIC".

Apenas na edad di cinco aña Mirugia a cuminsa tumales di canto cerca e conocida maestra Rhoda Frigerio. Despues di un aña e la bay forma parti pa coro Tuti Fruti y Young voices bao di direccion di e conocida maestra Maybeline Arends Croes.

Cu su 13 aña e la bay forma parti hunto cu e popularisimo grupo infantil Pierewietje bao direccion di Martha Figaroa, cariñosamente yama Tante Martha. Na edad di 15 aña despues di 10 aña di experiencia den farandula, Mirugia tabata tin e curashi pa bay canta como solista. E tabata canta pa tur fiestanan di Kiwanis, Women's Club, bruid, entiero, Television y tambe pa fiestanan priva.

Tambe e tabata forma duonan hunto cu e popular artistanan local e.o. Eri Donata, Micheal Odor, Claudius Philips, Edwin Abath etc. Na aña 1990 hunto cu algun ex pierewietjenan nan a forma grupo MISS, (Mirugia, Indira, Sasha y Sharon). Tur su contractnan como solista tabata wordo maneha pa su manager Onno van Romondt, cual e tin hopi aprecio pé.

Na aña 1991 despues di hopi consehonan, apoyo y yudanzanan, e.o. di su manager, famianan, amistadnan y UNOCA, su sonjo a realisa pa bay studia musica mas profundo, especialmente den canto na Boston Massachusetts, den e prestigioso BERKLEE COLLEGE OF MUSIC. Su prome springsemester a bay hopi bon



logrando averagenan hopi halto.

Recientemente e la termina su dos springsemester, y actualmente ta sperando su resultadonan. Mirugia tin hopi confiansa cu e resultado aki tambe lo bay ta satisfactorio. Mirugia trankilamente y cu tur su pasenshi a sinta splica DEN AMBIENTE detayamente kico ta ensera su estudionan na Boston. Meta di su estudio ta pa profundisa su mes den canto profesional.

Su orarionan di estudio ta varia entre 10or di mainta pa 2'or di atardi, di dialuna pa

diabierne. E la cuminsa cu su prome springsemester cu ocho vak.

E ocho vak nan aki ta ensera:

No.1) MUSIC NOTATION, sinja con ta pinta tur tur locual tin di haber cu musica.

No.2) ARRANGING 1, sinja con pa arregla un cancion basicamente.

No.3) EAR TRAINING, sinja capta oïdonan di diferente ritmo y tononan.

No.4) HISTORY OF ROCK MUSIC, sinja historia di musica rock, cual e mes

a escoge.

No.5) HARMONY 1, teoria di musica.

No.6) VOCAL LAB - READING 1, sinja lesa musica cu solfeo.

No.7) VOCAL LAB - REPORTORY 1, canta diferente cantica tur siman uno, y ricibi critica of elogio.

No.8) PRIVATE INSTRUCTION - VOICE, tur siman mei ora sinja technica pa domina rosea, y technica di canto. Mirugia a termina e ocho vak nan aki cu un average sobresaliente di 3.40, cual ta un average hopi respeta. Su segundo semester ta ensera 6 vak.

No.1) EAR TRAINING 2. No.2) HARMONY 2. No.3) PRIVATE INSTRUCTION VOICE 2. No.4) BASIC KEYBOARD, sinja toca keyboard basicamente. No.5) STAGE PERFORMANCE, sinja actua riba stage. No.6) ADV TECH OF VOICE, canto mas avansa. E seis vak nan aki Mirugia ta sperando anciosamente riba e resultado.

Segun e talentoso estudiante aki cu e ta sintie hopi bon na Boston. Na Boston Massachusetts e la goza di varios conciertonan di artistanan grandi manera Gloria Estefan, Sting, Madonna etc. Tambe Juan Luis Guerra cu tambe tabata un docente di Berklee College a duna un concierto hunto cu su grupo 4.40, pa e studiantenan di dicho colegio. Mirugia ta saliendo pa Boston mayan diadomingo, despues di a pasa su vacacion riba su dushi isla Aruba.

E lo bay sigui cu su estudio cual ta un studio di cuater aña, pero ta pensa di termine den tres aña tumando dos semester. Despues di termina su estudio e lo regresa Aruba bek. DEN AMBIENTE ta spera cu Mirugia lo sabi di termina e prestigioso "BERKLEE COLLEGE OF MUSIC" aki exitosamente, y cu Aruba lo bay dispone atrobe di un gran musico. Tur cos bon y sigui AS-INA!!!

Pa cualquier ocasion

ABSOLUT VODKA

la bebida preferi

Agentia exclusiva LICORES ARUBA

BLUE WAVE

Yen di ambiente y gozo!!

THE ARUBIAN BAND